

AKASHVANI AIZAWL

REGIONAL NEWS BULLETIN

HEADLINES (EVENING)

- 1. Special Intensive Revision (SIR) 2026 thawh thumna kalpui mekah, Mizoramah vote nei thei mi nuai 8, sing 2, sang 8, 906 an awm.
- 2. Ramchhunga Electoral Roll ennawn beihpui thlak mekah Mizoram chu Enumeration Form zaa za digitization zo hmasa ber a ni.
- 3. Prime Minister Narendra Modia chaun vawiin khan Rajasthan-a Balotra atangin hmasawna hna cheng vaibelchhe nuai 1 leh sang ruk hu a hawng
- 4. Parliament Fur thutkhawm chu tun thla ni 20 ah tan a ni dawn.

<><><>

SIR

Special Intensive Revision (SIR) 2026 thawh thumna kalpui mekah, Mizoramah vote nei mipa nuai 3, sing 9, sang 9, 25 leh hmeichhia nuai 4, sing 2, sang 9, 881, an vaiin mi mi nuai 8, sing 2, sang 8, 906 an awm.

Vawiina Chief Electoral Officer Pi Garima Gupta-i'n I&PR Conference Hall, Aizawla thuthar thehdarhtute a kawmnaah he thu hi sawiin, SIR, 2026-ah hian roll thar hlak buatsaih niin, electoral roll-a chuang thei chin chu kumin July Ni 1-a kum 18 tling chin te an ni a ti a. Mizoramah May ni 30 atang khan Enumeration Phase kalpui tan niin, Mizorama BLO te chuan in tina lut lawrin Enumeration Form nuai 8, sing 7, sang 5, 68 sem chhuakin, Enumeration Form nuai 8, sing 2, sang 8, 906 an lakhawm a, EF an lak let theih loh mi sing 4, sang 6, 163 te chu mitthi tawh, awmna chin hriat loh, hmun danga pem, roll a thun tawh leh chhan dang vang te a ni.

He huna tarlan anih danin, Assembly bial zingah Aizawl South II bial chu EF lak khawm theih loh tam berna niin, 2,351 a awm a ni. SIR an kalpui mekah hian Aizawl district-ah vote nei thei tam berin vote nei mi nuai 2, sing 7, sang 2, 366 an awm a, Hnahthial district chu an tlem berna niin vote nei mi sing 1, sang 5, 443 an awm a, Mizoram pumah service voters mipa 4091 leh hmeichhia 91 an awm bawk a ni. Vote nei zingah thalai kum 30 atanga kum 39 inkar tam berin mi nuai 2, sing 3, sang 1, 879 an awm a, SIR 2026 kalpui chhung hian Mizoramah Polling station thar 52 siam niin, pakhat paih a ni a, heti hian tun dinhmunah Polling station 1352 a awm mek a ni.

Byte: CEO Garima Gupta

Election Commission of India (ECI) ruahmanna ang chuan Draft Electoral Roll tar chhuah ni hi Naktuk Pathianni a nih avangin CEO Office, Mizoram ngenna angin vawiin hian sawn a ni a, District zawng zawngah vawiin hian tarchhuah a ni. Vawiin July ni 4-a draft roll tlangzarh a nih atang hian thla leh August ni 4 thleng, Draft roll-a chuang ve hman lo kum tling thar te, Enumeration Form thehlut ve hman lo te , Electoral roll atanga paih ngai, draft roll-a chuang si an awm chuan te leh Electoral Roll-a chuang tawh siam that ngai nei te tan claims and objection period hawn a ni bawk.

<><><>

SIR DIGITIZATION

Ramchhunga Special Intensive Revision kalpui mek state leh Union Territory zingah Mizoram chu Enumeration Form zaa za digitization zo hmasa ber a ni.

Vawiina Chief Electoral Officer Pi Garima Gupta-i'n a tarlan danin, SIR, 2026 Third Phase hi state 16 leh Union Territory 2 ah kalpui a ni a, an zingah hian Mizoram chu Enumeration Form zaa za digitization zo hmasa ber niin, June ni 25 khan zawh fel a ni.

Mizoram Assembly bial zingah Tuichang Assembly bial leh District zingah Khawzawl District te chu Mizorama enumeration form digitization zo fel hmasa ber an ni tih he hunah hian CEO chuan a sawi bawk a ni.

<><><>

JAIL BREAK

Central Jail atangin damchhung tang tura tih Zothanpuia chu vawiin chawhma khan a tlan chhuak a, zawn mek a ni.

Akashvani Aizawl News thudawn danin, Zothanpuia hi Zohmun, Manipur a mi niin, damchhung tang tura a chungthu rel a ni a.Vawiin chawhma dar 10:30 leh dar 11:30 am inkar bawr vel khan a hnathawhna hmun atangin a tlan chhuak a, tunah hian zawn mek a ni. Zothanpuia hi kumin chhunga jail atanga tlan chhuak hmasa ber nia thudawn a ni.

Tun dinhmunah Mizorama Jail 10-ah te mi 1, 823 an tang mek a, mipa 1, 608 leh hmeichhia 202 bakah mi tang fate naupang 13 an ni a. Mi tang leng zat aiin 297 in an tam a ni. Centrail Jail chu mi tang tam berna niin, mi 510 lennaah mi 879 an tang a, Champhai District Jail-in dawtin mi 105 lennaah mi 216 an tang mek a ni.

<><><>

MIDDLE SCHOOL TEACHERS ASSN

Mizoram Govt. Adhoc Aided Middle School Teachers’ Association Meeting chuan an dinhmun pangngai Provincialise-a awm leh turin theih tawp an chhuah dawn tih an sawi.

Kan corr report lo ngaithla ang,

Mizoram Govt. Adhoc Aided Middle School Teachers’ Association vawiina meeting chuan an chungchang sorkarin a rel danah an lungawilo tih vawiin khan

thuchhuah siamin an sawi a, kum 2008 a Govt. Adhoc Aided Middle School a hlan kai School 64 zing atanga tehna hrang hrang hmanga Sorkarin a teh hnua 2023 kum-a Provinsialise dimhmuna a hlankai takte kha School 48 an ni a, amaherawhchu 2024 kum khan heng School 48, Provincialise dinhmuna hlan kai takte hi chhuanlam eng eng emaw siamin Sorkar chuan a sut leh mai a. Dan leh hrai fel lote siam that a nih hnua an dinhmun pangngai Provimcialise-a dah chhoh leh mai tura hrilh niin a changtu Minister ngei pawhin Provincialised a kan awm zui leh nghal tur thu leh School Signboard leh Seal zawng zawnga ‘Government’ tih an lo dah tawh pawh thlak danglam lo tur leh hman zui leh nghal mai tur anih thu a hrilh a ni an ti.

Hetihlai hian kumina Provinsialise Order chu Sorkarin tichhuakin a hmaa Sorkar-in a lo Provincialise tawh Adhoc Aided Middle School 48 zinga 4 chauhte chu Provincialise an ni zui ta mai a. Middle School 48 zinga 44 te chu tun dinhmuna an khua leh Veng mihring zat atanga teh pawhin Sorkarin zirlai nei tura a phut zat 100 chu sang an ti hle a, Sorkarin a phut zat zirlai 100 chu engtikah maha tlin thei dinhmuna an din loh avangin he tehfung hi Sorkar chuan ngaihtuah tha leh a, inang tlanga ‘Relaxation Clause’ hmanga an dinhmun pangngai Provincialise dinhmuna dah let leh an phut tlat a n, an ti.

<><><>

NAZARETH HOSPITAL

Mizoram Universal Healthcare Scheme (MUHCS) zawmtu damdawiin Aizawl a Nazareth Hospital-a lut tharte tan a thlawna inenkawlna a kaihlak hlek hnua sorkar leh damdawi in chu inbe remin vawiin atangin an kalpui leh tan.

Akashvani Aizawl News-in Nazareth Hospital Managing Director Pu Lalduhawma a kawmnaah Nazareth Hospital chuan nimpiniah Ningani khan an dam lote awmna group-ah cashless-a an kalpui theih rih loh thu an chhuah a, hemi hnu nimin khan sorkar nen inbe rem nghalin vawiin atangin sorkar atangin bill tlem a zawng an dawng a, bill tang pawh an pe leh vek tawh a, mipuite tan cashless-in bill an kalpui leh tawh tih a sawi a ni.

Mizoram State Health Care Scheme-in damdawi in empanelled zingah bill diklo thehlut an awm thin thuleh chhan hrang hrang avanga Nazareth damdawiina lut thar turte tan cashless a theih rih loh thu an sawi chungchanga Akashvani zawhna chhangin, Nazareth Hospital Managing Director Pu Lalduhawma chuan Damdawi in lam dik lohna chungchangah chuan sawi tur an nei lova, dik lova thil tih awm se, sorkar chuan inremna a ziahpui dawn em ni tih chu an zawhna a ni tih a sawi.

<><><>

KOLASIB

Kolasib Diakkawn Bazar thar sak hna bul tanna chu vawiin khan Mizoram Legislative Assembly Deputy Speaker leh bialtu MLA ni baw, Pu Lalfamkima hovin hman a ni.

Pu Lalfamkima chuan thu sawiin, bazar chu sumdawnna leh hmasawnna hmun pawimawh tak a nih thu a sawi a. Mi tam tak eizawnna hmun a nih avangin

sawrkar pawhin a ngai pawimawh hle a ni, a ti. Bazar thar sak chhungin bazara thuten harsatna an tawh loh nan ruahmanna siam a nih thu sawiin, dawhthei tak leh pangchang mai lova, bazar thar sak chhung chu chhel taka sawrkar hmalakna tawiawm turin mipuite a chah a ni. Kolasib pa ngeiin bazar sak hna a thawk dawn chu lawmawm a tih thu sawiin, tha taka sak puitling ngei a nih a beisei thu a sawi. Kolasib Venglai Bazar pawh sak that tura ruahmanna chak taka kalpui mek a nih thu a tarlang bawk.

Hawanna inkhawm tawi hman zawh a nih hian Deputy Speaker leh bialtu MLA Pu Lalfamkima chuan bazar thar sak hna bul tanna atan bazar hlui kailawn bang chu a vaw thiat nghal a ni.

Vawiin hun hmanna ah hian veng chhung VC member te leh mi thahnem tak an kalkhawm a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

PM

Prime Minister Narendra Modia chaun vawiin khan Rajasthan-a Balotra atangin hmasawнна hna cheng vaibelchhe nuai 1 leh sang ruk hu a hawng. Heng project te huang hrang hrang niin petrochemical, khawpui inkalpawhna, railway, kawngpui, energy thianglim, leh kawlphehtha inpek kualna te a ni a. Hei bakah hian Jaipur Metro Rail Project Phase 2 lungphum a phum bawk a. Vawiin chhun vek khan Prime Minister Modia hian Rajasthan sawrkar hnuaia hna hmu thar thalai sing 5 leh sang 4 te hnenah appointment letter a hlan bawk a ni.

<><><>

PARLIAMENT SESSION

Parliament Fur thutkhawm chu tun thla ni 20 ah tan a ni dawn. Monsoon Session hi thlaleh August ni 13 thleng awh tur a ni a. Union Parliamentary Affairs Minister Kiren Rijiju chuan sawrkarin July ni 20 a Monsoon session neih tura a rawtna chu President Droupadi Murmu-i chuan a pawm thu a sawi a. Pu Rijiju chuan session ah hian sawihona tha tak leh ram tana thil pawimawh tak takah thutlukna siam an tum dawn tih Social Media ah a tarlang a ni.

<><><>